

**Verootmoedigings  
Gebed tot ons VADER**

*Die gebed*

O, VADER, Opperhoof van die hemele, grote en gedugte Heerser, wat die verbond en die goedertierenheid hou vir die wat U liefhet en U gebooie onderhou. In verootmoediging bring ons U eens uitverkore volk voor U; laat U oor tog opmerkzaam en U oë oop wees, om te luister na die gebede van U volk wat vandag voor U aangesig deur die geloof 'n gebed plaas; Ja, die Yashar'EL / Boervolk, die verstrooide volk anderkant die riviere van Kus; Suid Afrika, U knegte 'o' VADER. So het ek en my familie ook gruwelik teen U gerebelleer. Ons het baie verkeerd gehandel teenoor U, en ons het die gebooie en insettinge en verordeninge wat U aan Moses, U kneg, beveel het, nie gehou nie. Ons het U aangesien en verkleineer as 'n "drie enige Magtige" en weet dit was verkeerd, want U is Twee; U die Oue van Dae en U Seun die Magtige Een. Ons het U in Baal name aangespreek en weet nou dat dit U toornig maak, ons voorvaders wou 'n aardse heerser gehad het soos die heidene en dit het U ontstig. Ons het tot daardie oortredings besef gekom; dink tog aan die woord wat U aan Moses, U kneg, beveel het, naamlik: As julle ontrou is, sal Ek julle onder die volke verstrooi; maar as julle jul tot My bekeer en My gebooie onderhou en dit doen - al was julle verjaagdes aan die einde van die hemel, dan sal Ek hulle daarvandaan versamel en hulle bring na die plek wat Ek verkies het om My Naam daar te laat woon.

Ons is skuldig aan oortredinge, ons het gruwelik oortree, verkeerd gedoen, boos gehandel, in opstand gekom, van U gebooie en Verordeninge afgewyk. Ons was halsstarrig en nie geluister na U Knegte wat in U Naam gespreek het tot ons en ons vaders en tot die hele volk van die land nie.

Aan U, o VADER, kom die eer en geregtigheid toe, maar aan ons beskaming van die aangesig soos dit vandag is; Ja die wat naby en die wat ver is in al die lande waarheen U hulle verdryf het, oor hulle ontrouheid wat hulle teen U begaan het. VADER aan ons kom toe beskaming van die aangesig, aan ons owerstes en aan ons vaders, omdat ons U Wette geminag het.

Ons vra met smeking o VADER dat U, U Seun, wie U spoedig as Regter, Heerser en Koning op hierdie aarde moet kom vestig. Want by U o VADER, onse VADER, is barmhartigheid en vergewing, want ons het teen U en U Seun opgestaan en na die stem van YAHUSHA "U Gesalfde" onse Almagtige Heerser, nie geluister om te wandel in U wette wat U ons deur die diens van U knegte "die profete" voorgehou het nie. Maar die hele Yashar'EL/ Boervolk het U Wet oortree en afgewyk deurdat hulle nie na U stem geluister het nie. Hulle het 'n aardse heersers gesoek en U teleurgestel daarom is die vloek, die eed, die vernietig oor ons uitgestort wat geskrywe is in die wet van Moses, U kneg.

Ons het teen U, o VADER, en U Seun YAHUSHA wetsoortreder geword. Daarom soos in die Wet van Moses geskrywe is - al hierdie ongunstigheid het oor ons gekom en ons het die aangesig van U, o VADER, en onse Opperhoof nie om U guns gesmeek deur ons te bekeer van ons ongeregtighede en wetteloosheid nie; Ja nie ag te gee op U waarheid nie. Met diepe ootmoed staan ons voor U, o VADER, met smeekgebed dat U, U Seun sal toelaat dat Hy Sy ereplek sal kom inneem; dat YAHUSHA U Gesalfde sal terugkom as YAH ons Koning en ewiglik sal kom heers en dat Hy op Sy troon kan kom sit om oor ons te kan kom regeer.

U was wakker oor die onreinheid, om dit oor ons te bring; U onse VADER is regverdig by al U werke wat U doen, maar ons het nie na YAHUSHA se stem geluister nie.

O VADER, grote Majesteit, ons smee en pleit by U om ons gebed te verhoor; laat vir U 'n nageslag in hierdie deel van Suider-Afrika. Moet tog nie al die geroepe Boere-Yashar'EL "U uitverkore" vernietig en die stuk aarde wat U aan hulle toegestaan het, sonder inwoners nie. O VADER, laat tog volgens al U geregtigheid, U toorn, en U grimmigheid versag van hierdie land en diegene van U gewyde, afgesonderde volk, wat tot erkenning van oortredinge van ons vaders ingesien het.

U volk in die Suider-Afrika het 'n voorwerp van versmading en veragting vir die wêreld geword. Die teenstanders verbly hulle in ons smaad, hulle vra: Waar is jou sogenaamde Magtige Heerser wat sal help? Merk tog op dat Ha satans werkers en handlangers ons wil vernietig! Daarom hoor dan nou onse VADER na die gebede van U knegte en na hulle smeking, en laat ter wille van YAHUSHA, U Seun, U aangesig skyn oor U gewyde afgesonderdes, wie hulle bekeer en verootmoedig.

O VADER hoor en neig U oor ons belydenis en open U oë en aanskou ons verwoeste plekke en al die baie moorde, verkrachtings en die wetteloosheid; Die land waar U ongehoorsame volk woon; Die volk vir wie U asseblief weer U Naam moet uitroep, want nie op grond van ons geregtigheid werp ons, ons smeking voor U aangesig neer nie, maar op grond van U grote Naam wie ons geminag het.

O VADER ons hemelse HEERSER, U het U Seun YAH na ons gestuur om U Woord deur te kom gee, ook het ons dit deur die eeue geminag, daarom het U ons aan 'n slegte gesindheid oorgegee sodat die wêreld U uitverkorenes haat en uitmoor. Maar dink daaraan dat dit U wil was, dat U volk nie aan die wêreld verbonde / gelyk moes wees nie. U het toegelaat dat U Seun YAH heengegaan het om vir die getroues 'n plek by U in die hemel te berei. YAH het self gesê: In die huis van My VADER is daar baie wonings.

Ons is in nood daarom met groot begeerte smeek ons dat U ons gebed sal verhoor; daarom VADER hoor, VADER vergeef! VADER, merk op en doen dit;

O VADER vertoef tog nie om U grote Naam ontwil. Ons erken dat U Seun dié Magtige Opperhoof is van alle geeste, wat moet kom in U Naam “YAH” en ons regeerder. U grote Naam wat ons geminag het, wat oor U volk uitgeroep was.

Kom o VADER, Ewig – Lewende Magtige Heerser en werp die aards heersers met hulle trone in die buitenste duisternis. Ons soek nie meer aardse leiers nie, maar U dié Allerhoogste en U Seun YAH.

‘n Uitroep na U o mees Getroue, Gewyde, Majestueuse, Magtige, Liefdevolle, Barmhartige, Regverdige en Ewig – lewende

Ek bid en vra in verootmoediging, en pleit met smeking, nie net vir my en my gesin nie, maar ook vir U volk ‘dié Boervolk van Suid Afrika.

Amein ja Amein ! Halleluja !!

-----

Mag VADER jou gebed aanhoor en ons in Sy guns aansien sodat jy deel kan wees van die 144 000 verseëldes.

*Skrif gedeeltes ter stawing van gebed.*

Ex. 15:26; Ps. 55:17,18; 103:2-4; Spr. 15:29; 1 Kron.29:10-20; Neh.9; Dan.9; Matt.6:9-13; 26:36-44; Joh.17; Luk.11:2-4

Bedink dit